

Museo Historico ta puntra expertonan tocante “Shell Midden”

ORANJESTAD – Recientemente, durante trabounan di remodela bar y cushina di Museo Historico Aruba, a topa evidencianan cu ta provee un bista valioso riba actividadnan Amerindio den e area di Oranjestad.

Directora di Museo Historico, Zahira Zaandam, a reconoce e importancia di locual a wordo descubri ora trabounan di reconstrucion a inicia y mesora a tuma contacto cu e Departamento Cientifico di Museo Arkeologico. E team di MANA a presenta na Museo Historico y a haci un evaluacion di locual a haya na unda a dicidi di biaha pa cuminsa cu un investigacion preliminar na e sitio di excavacion.

Resultadonan

Despues di esaki y algun investigacion mas profundo riba materialnan haya, den laboratorio di MANA, a yega

na e conclusion cu ta trata di un Shell Midden (capanan di tera cu depositonan di cocolishi laga atras pa hende di pasado) di e periodo Ceramico. E resultadonan di e investigacionnan ta lo siguiente: E area total di construccion



cu a wordo habri ta cubri 34,2 m2, di cual e fundeshi excava ta 6 m2. Den e area excava a haya material di cocolishi di cual mayoria ta Strombus gigas di diferente

tamaño y di cual hopi tabata chikito. Tambe a descubri Strombus costatus grandi cu lip diki. E tipo di cocolishi aki, aunke relativamente comun pa Shell Middens, normalmente no ta sosode den tamañonan asina grandi

y cu lip asina diki. Ademas, no a haya niun material di ceramica. E ausencia di ceramica probablemente tin di haber cu e factor cu e area di excavacion ta relativamente chikito compara cu e area total di e Shell Midden. Tin un



indicacion fuerte cu e Shell Midden ta extende pafo di e area descubri y ta continua bou di e muraya y e vloer di e forti y abou di e cas cu antes tabata di Hartog.

E muestra di material di cocolishi bou di e muraya di e forti, ta indica cu e Shell Midden aki a wordo forma den e Periodo Ceramico. E descubrimiento di e tipo di material di cocolishi ta duna un indicacion di e tipo di actividad y e cuminda marino cu a wordo colecta pa

e Amerindionan den e area di costa directo. Ta parce cu e Shell Midden aki ta relata na cantidad di cuminda so y no na actividadnan manera preparacion pa cuminda y of vivienda a corto plaso. Probablemente esaki tin di haber cu e localidad di un habitat cercano pa cual motibo no tabata necesario pasa hopi tempo na e Shell Midden.

Historia

Durante tempo Oranjestad a desaroya rapidamente y den añanan 1930 tabata casi completamente cubri cu asfalt y edificionan.

Como resultado di esaki, no tabata tin mucho posibilidad pa documentacion y investigacion di actividadnan Amerindio (Indian) den e area di Oranjestad, cu excepcion di descubrimiento di materialnan arkeologico durante actividadnan di construccion cu ta wordo reporta na Museo Arkeologico Nacional Aruba (MANA). □

